

# Hogando den Pisinan Yen di Serbes

Dia 14 di òktober tabata un dia históriko pa nos islanan. Antilliaanse Brouwerij a informá nos ku despues di 34 aña di eksistensia, el a yena su di un miar bòter di bebida alkohólíko. Korant a yuda nos komprende kiko ke men 1.000.000.000 bòter di serbes: "Bon mirá si pone e mil mion bòternan banda di otro, lo por pasa un biaha i mei rondo di mundu. Si pone e bòternan un riba otro lo yega na mitar kaminda entre mundu ku luna, i ku e contenido lo por yena pisina Benny Leito na Rif mas ku 150 biaha."

Mirá di un otro banda, si Amstel Brouwerij a produsí mil mion bòter di serbes, esei ke men ku nos a **bebe** e contenido di e un bion bòternan ku nan yena. Si nos asumí ku poblashon di nos islanan ta 250.000, nos por saka afó ku kada habitante mester a bebe 4.000 bòter di serbes Amstel!

Ora nos ta kòrda ku tin hopi otro marka di serbes riba nos merkado, i ku sierto marka (por ehèmpel, Heineken) ta hopi popular, nos ta bin komprende ku nos poblashon ta bebe un kantidat enorme di serbes. Kuantu shen pisina mas e contenido di e bòternan i blekinan ei lo por yena?

Ora nos ta realisá kuantu problema tur e serbes aki ta kousa, nos mester konkluí ku nos komunidad ta hogando den bebida alkohólíko.

Loke ningun serbeseria ta informá nos ta kuantu aksidente di outo **nan** bòternan ta okashoná. Nan no ta mostra nos e kurpanan deformá, kuartisá, tur na sanger, di hende inosente ku a muri den aksidentenan horibel pasobra un shofùr tabata bou di influensia di **nan** produkto. Ningun serbeseria ta konta nos di esnan ku ta keda hèndikèp òf ku problema mental òf sikológiko bida largu pasobra un hende ku **nan** beter aden ta sinta tras di stürwil di outo.

E propagandan di serbes ta mostra nos hende salú, inteligente, felis, hende ku ta gosa. E men-sahe kla ta: "Bebe nos serbes, i bo tambe lo ta felis, bo tambe lo por gosa asina!" Ma nan propaganda nunca lo muestra nos potrèt di e buraché sushi, drumí kantu di kamina, inkonsiente di loke ta sosodé rònt di dje komo resultado di **nan** produkto. Nan lo no mostra nos e mama ku su yunan chikitu den un kas fèrfal blo bashí, desesperá, pasobra su kasá huntu ku su amigunan a drispidí e kinsena ku el a kaba di kobra. Nan no ta laga nos sa kuantu divorsio ta okashoná di gran parti pa **nan** bòternan. Nan nunca lo pasa na televishon esenan violento ku sa tuma lugá na kas òf riba kaya pa motibu di **nan** serbes.

Nan lo no mostra nos e gòlpinan, e hinkamentu, e kapmentu, e tiroteo, e asesinato, èts. bou influensia di **nan** bebida. Instigá pa alkohòl, hende ta kometé aktonan horibel ku ta duel nan pa e restu di nan bida.

Puntra un doño di trabou kuantu serbes ta benefisiá e empleadonan si su kompania. E no por kalkulá kuantu ora ta bai pèrdí, kuantu hende ta mèldu malu djaluna mainta, kuantu plaka e kompania ta pèrdè, pa motibu di alkohòl!

No ta hustu pa tira tur e kulpa riba serbeserianan. Ta klaro ku esun ku ta kumpra e bòternan di serbes ta responsabel pa su akshonnan bou di influensia di alkohòl. Si e tin un aksidente di outo miéntras e tin beter aden, e tin ku sufri e konsekuensianan. Ma di otro banda, un serbeseria no por laba man limpi i hunga inosente. Pa kada daño ku serbes ta kousa na nos islanan—i e daño sosial, físiko, spiritual, mental, finansiero, èts. ta hopi —tantu e serbeseria komo e bar, snèkbar, i e tienda ku ta bende e serbes **ta kulpabel!**

Algun hende sigur lo protestá kontra un akusashon asina pisá! Ma esei ta presis e mésun rasonamentu ku nos ta usa pa ku droga. Ora un drogadikto ta kometé un delitu, nos no ta akusá e chòler so. Nos ta kondená tantu esun ku a bende e droga, komo e trafikante di droga, komo esnan ku ta krese e mata di koka. Pakiko anto nos no por mostra riba kulpabilidat di esnan ku ta produsí òf bende e droga mas popular di nos islanan, alkohòl, huntu ku esun ku ta beb'é.

Palabra di Dios ta bisa: "Biña ta un hasidó di bofon, bebida stèrki ta un borotadó; i ken ku ta bou di su influensia, no ta sabí" (Proverbionan 20:1). En bista di Dios Su evaluashon di serbes i e desaster ku bebida ta kousa, e shenes di pisina yen di serbes ku nos islanan ta produsí, bende, i bebe, ta un bergwensa pa nos komunidad, no un echu pa selebrá!